

四庫全書

史部

欽定四庫全書

史部

殿閣詞林記卷三

詳校官侍讀_臣陳萬青

刑部郎中_臣許兆椿覆勘

總校官進士_臣繆琪

校對官編修_臣莊通敏

謄錄監生_臣王宜

欽定四庫全書

殿閣詞林記卷三

明 廖道南 撰

閣學

文淵閣大學士宋訥

宋訥字仲敏大名滑縣人父崇祿元陝西行臺侍御史
訥博學強記勤遵矩矱性遲重不妄言笑登元至正癸
卯進士任鹽山縣令洪武十三年徵為國子助教橫經

發難繁郭廓塞學者如歸嘗同諸儒應制撰諸勅文操
筆立就雅稱上意遠遷學士十五年五月命撰宣聖廟
碑文賜衣帽文綺鈔錠秋七月庚戌上謂訥曰朕觀尚
書至敬授人時嘗嘆敬天之事後世中主猶能知之敬
民之事則鮮有知者蓋彼自謂崇高謂民皆事我者分
所當然故威嚴日重而恩禮寢薄所以然者視民輕故
也視民輕則與已不相干而畔渙離散不難矣惟能知
民與已相資則必無慢視之弊故曰可愛非君可畏非

民衆非元后何戴后非衆固與守邦古之帝王視民何
嘗敢輕故致天下長久者以此而已是月有廣東儒士
獻治平策上覽之謂訥曰此人不識道理豈有涉數千
言而不及用賢天下之大欲朕一人自理可乎蓋自知
而用則所見者狹知賢而用則所及者廣訥對曰賢才
在天下人主豈能知之必賴羣臣薦舉然得賢與否係
所舉在何如爾上曰小人所舉未必為君子君子所舉
未必為小人故觀其舉者可知其人之賢否矣十一月

以訥為文淵閣大學士制曰朕觀古今賢者遇君有遲
速名譽有先後昔望于磻溪有飛熊之兆而乃興周八
百訥年雖高邁特授是官爾往欽哉未幾以為國子祭
酒上復勅諭曰太學賢士所關禮義所由出人材所由
興自建學以來厯選師儒以居是職至今未臻其效豈
士習之難變與抑師道之不立與此朕所以夙夜究心
慎擇老成以任之惟卿夙學者德可以任此卿宜體朕
意使士習丕變邦其有賴焉十八年二月甲辰陰晦不

雨雪電如雷訥上守邊策曰今海內既安蠻夷奉貢惟
沙漠未遵聲教若置之弗治恐歲久滋患邊圉卒荒若
窮追遠繫恐士馬疲費餽餉艱難陛下為聖子神孫萬
世計莫若善備邊之策爾備邊固在乎兵食足食又在
乎屯田漢本始中匈奴率十萬餘騎為寇趙充國乃率
四萬騎分屯緣邊九郡單于聞之引去夫以四萬騎屯
九郡而充國統制其間則當時之籌畫可見矣今諸將
中豈皆借才於異代哉宜選其有智勇謀畧者數人每

將以東西五百里為制隨其遠近高下分屯所領衛兵
斟酌損益率五百里一將彼此相望首尾相應耕作以
時訓練有法遇敵則戰寇去則耕此長久安邊之策也
上善其言其為祭酒嚴毅莊敬諸生畏如神明乙丑戊
辰兩科得士最多而魁選出太學大被賞遇及遘疾上
遣中使諭之畧曰卿稟性純誠疾必速瘥命畫工圖其
像子麟往候問至廂房疾篤始請歸寢訥厲聲曰何風
雲氣少兒女情多耶卒年八十上親為文祭之官其次

子復祖為司業廖道南曰往予甲戌遊南雍時沔陽魯公鐸為祭酒乃令習誦監規乃嘆我聖祖每戒教諸生恒曰宋訥云乃知師道立吾人多訥之名不朽矣彭韶贊曰中州文獻遺緒可徵稽古力學飾車以行百僚讓德六館蜚聲嚴而有度樂育羣英乃叙教條爾準爾繩士皆適用一人以寧制詞褒重吾道增榮

文淵閣大學士朱善

朱善字備萬江西豐城人少聰穎十歲能文通五經四

書大義祖雲洞先生嘗謂人曰吾孫他日必為令器及壯以經學授徒壬辰兵變隱居鄉里養親教子杜門絕跡以聖賢道學為己任奉繼母李氏克盡孝道友諒戰爭扶母奔竄十餘日復全人謂孝感所至高皇帝平一海內開建學校乃以豐城為富州州守強憲中南昌守許方俱延至郡庠教有成效以名聞於朝授郡學教授洪武八年廷試諸儒善為首乃以為修撰署院事知制誥逾年以奏對失旨謫戍遼東復改典籍放還十七年上

思用老成驛召善還京以為待詔七月戊戌上御東閣
謂善曰人君能以天下之好惡為好惡則公以天下之
智識為智識則明蓋人之常情多矜己能好言人過君
子則不然揚人之善不矜己之善貸人之過不貸己之
過又曰萬事不可以耳目察惟虛心以應之萬方不可
以智力服惟誠心以待之善嘗奏有國者重世臣有家
者重世婚近日禮教弗明婚姻混亂或已聘而見絕或
既婚而復離議律不精其禍乃至於此成周之世為婚

姻者不過齊宋陳杞數國而已故當時稱大國曰伯舅
小國曰叔舅世為婚姻可知也列國之君曹魏陳鄭秦
晉莫不皆然降及後世如晉之王謝唐之崔盧潘楊之
睦朱陳之好固不以世婚為重今宜弛禁以通人情別
族以明世教上從之十八年命主考禮闈撒棘之日乃
起遷奉議大夫文淵閣大學士五月辛酉朔上御華蓋
殿命善進讀心箴上曰人心道心有倚伏之幾蓋仁愛
之心生則忮害之心息正直之心存則邪詖之心消羞

惡之心形則貪鄙之心絕忠慤之心萌則巧偽之心伏
故人常持此心不為情欲所蔽則至公無私自無物我
之累矣八月丙辰善復言曰古者人君至治重在任人
蓋任衆賢為耳目則視聽周乎四海任衆知為計慮則
利澤施於萬民今天下太平惟選任賢才宜留聖慮上
曰任人之道當嚴於簡擇簡擇嚴則庸鄙之人不進當
專於任使任使專則苟且之意不行然必賢者乃可以
專任之非賢而專任者必生亂也是任人為難然人亦

有謹始怠終者亦有過於前改於後者固不能保其始終惟始終如一者其懷忠報國之心堅如金石安得不任之若匿詐似信懷姦似忠者決不可任也是年忽遭危疾上遣醫調治其子逢掖請告還豐城卒年七十有二屬纊正冠危坐舉手加額曰感荷聖恩無以報也語畢而絕鄉人見有星如虹墜其舍所著有詩經解頤輯釋史輯諸書廖道南曰予幼學詩誦善所著解頤輯釋頗得其要領然而國風民謠宗廟朝廷雅頌之詩爰自

千篇刪為三百亦已嚴矣宋儒泥於鄭聲淫之說遂槩
以為淫奔而不以進講豈皆作者之本旨哉思欲起善
于九原而與之論難又胡可得也林塾贊曰羨彼雲洞
煜有來裔道立教成令聞斯泮乃擢翰林掌帝之制寵
辱不驚皇極經世爰起校文登華振滯墜星有占歸則
云逝

東閣大學士吳沆

吳沆字濬之浙江金華人故元國子博士師道子也博

學有文累徵為縣庠訓導辭不就洪武十二年薦授待制十一月甲午朔上觀漢紀顧謂沉曰人君理財之道視國如家可也一家之內父子不異貲其父經營儲蓄未有不為子計者父子而異貲家必隳矣君民猶父子也若損民以益君民衣食不給而君獨富豈有是理哉丁酉上論持身保業之道又謂沉曰人當無所不謹事雖微而必慮行雖小而必防不慮於微終貽大患不防於小終虧大德謹小行而無已者可以成大善忽細事

而不戒者必至於成大惡常人且然況人君乎沉對曰
聖慮及此誠社稷永安之道上曰安生於危危生於安
安不克慮則能致危危而克慮則能致安在於能謹與
否爾上御奉天門視朝畢又謂沉曰人君治天下進賢
納諫二者真切事也沉曰求之於古克行者鮮矣是故
亂日常多治日常少上曰使其真知賢者與治其國何
有不好真知諫者在於忠已何有不納惟其知之不真
是以於已難入若誠能好賢則不待招徠而賢者自至

誠能納諫則不待旌賞而諫者必來沉曰陛下之言及此國家何幸焉未幾降編修十三年六月丁卯復以為待制沉薦教授童冀儒士吳慎遣使徵之十四年冬十月辛酉給事中鄭相奏言尊無二上稱臣於東宮是並所尊矣沉駁之曰東宮國之大本所以繼聖體承天位者也臣子尊敬之禮胡得而異焉請凡啓事東宮如舊制上從之十五年十一月戊午乃以為東閣大學士十六年二月朔上將享太廟沉進精誠錄先是上謂沉曰

朕閱古昔聖賢其垂訓立教大要有三曰敬天曰忠君
曰孝親君能敬天臣能忠君子能孝親則人道立矣然
其言散在經傳未易會其要領爾等其以三事以類編
輯至是書成上覽而善之命沉撰序三月沉因講周書
至國則固有立政用儉人上曰甚矣國家不可有小人
有小人必敗君子故唐虞任禹稷必去四凶魯用仲尼
必誅正卯沉進曰書言去邪勿貳所以深致其戒上曰
國家不幸有小人如蓄毒藥不急去之必為身患小人

金人正史卷之二十一
巧于悅上恐于賊下人君若喜其順己而恐其所為將
無所不至矣沉曰小人中懷奸邪而言似忠信不可不
察上曰然小人善於逢迎彼知人主所樂為者不顧非
義乃牽合附會曰是不可不為人主不樂為者不顧有
益於國家亦牽合附會曰是不必為此誠國之賊也自
古知人固難而知言亦不易八月丙戌以進講後期降
侍書尋改博士十九年七月丁丑卒沉富蓄遠覽嘗因
奏對誤遷渭源教諭未行改典籍陟大學士考功監劾

其怠事降侍讀終博士三仕三已無喜愠人以此多之
廖道南曰予觀沉所進精誠錄其學粹乎正矣至論小
人不可用斷斷乎其為確論也金華之學沉亦可取矣
贊曰於乎君子浙水之英奇氣煥發正學端純精誠有
錄格于皇天天心克享秉志彌堅三仕三黜喜愠不形
於乎君子浙水之英

文淵閣學士兼左春坊大學士解縉

解縉字大紳世居鴈門厥後徙居吉水遂為吉水人曾

大父應辰元高安教諭應辰生子元子元生開先開先生緡緡生而英悟奇絕五歲誦書七歲賦詩十歲日記數千言十八舉江西鄉試第一洪武二十一年計偕如京師考官劉三吾閱卷極其稱賞名遂大振與弟綸暨女弟之夫黃金華同舉進士皇祖親加簡拔選緡及金華為庶吉士讀中秘書日侍左右特被寵眷一日寓大庀西室諭之曰爾緡試舉今日施政所宜直述以聞緡即屬草以進其畧曰陛下得國之正非漢唐宋所及取

天下于羣盜掠民生於塗炭命將出師皆受成筭不假
良平不倚信布女寵外戚寺人藩鎮之患消融底定且
不邇聲色不殖貨利不為遊畋又遠過漢唐宋之君而
無愧三代盛王矣夫令出惟行也不宜數改令數改則
民疑刑期無刑也寧失不經刑太繁則民玩今好善而
善不顯善者未必蒙福惡惡而惡日滋惡者未必蒙禍
臣願篤惇信之本加慎密之功喜怒一聽于天理存養
無間于須臾夫人君不以察為明也元首叢脞則股肱

情萬事皆隳人君當以德為政也帝德固愆則衆志應天命用休今畏天畏鬼神矣畏民則未至治民治強暴矣治心則未至臣願畏民為畏天之本治心為治民之本祭不必瀆受無咎之福神不必勞享無為之治夫經正則庶民興故孟子距詖行息邪說臣願上泝虞夏商周之華輿下及濂洛關閩之佳葩釋老之壯者驅之復于人倫經咒之妄者火之絕其欺誑斷瑜珈之教禁符式之條夫名不正則言不順故賈生定官名易服色臣

願明經制以任諸侯王於衆職推恩義以待百執事于
一體大臣不施辱罰屬官不加捶楚夫禮樂不備非所
以協神人臣願配天復掃地之規尊祖隆七廟之制祀
列聖于太學祀孔子於諸學而又訪求審樂之儒大備
禮經之缺夫險要不防非所以保邦國臣願開武舉以
收英才擇闕隘以屯重鎮額設弓手課之以弓弩兼教
民兵習之于兵農而又時申戒飭之令特重官守之防
夫風俗不正非所以示民趨臣願倣藍田呂氏鄉約及

浦江鄭氏家範率先于世族以端軌則夫田稅不均非所以厚民生臣願行授田均田之法擬常平義倉之舉積久以歲月以豐財賦夫臺網不肅非所以屬清要長風采今御史糾彈咸承密旨未聞舉善但日除奸臣願去朋姦倚法之條使民有所恃而不恐夫賢路不清非所以勵頑鈍獎忠貞今椎埋罵悍列布朝省朝捐刀鋸暮擁冠裳臣願遵鄉舉里選之法使民有所勸而為善尤願陛下推所以愛臣之心以愛天下推所以待臣之

心以待萬物幸垂鑒焉奏凡數千言上嘉其識時兵部
侍郎沈潛忌縉才誣其狎侮胥隸上慮其中傷即拜江
西道監察御史值都御史袁泰構害張祖怙勢恣橫諸
御史莫敢糾其非縉執筆起草力詆其奸狀又代虞部
郎中王國用論救韓國公李善長寃疏上又慮其涵養
未至召縉父謂曰才之生甚難而大器者晚成其以而
子歸益進其學又諭縉曰朕與爾義則君臣恩猶父子
其歸益盡心于古人後十年來朕大用爾未晚也縉侍

父歸感恩勵志所造益深矣高皇帝升遐縉超赴臨權臣構害謂赴臨非詔旨遂謫河州未幾召還入為侍詔一日於宮中披覽建文時羣臣所上封事千餘通命縉徧閱有關政治者留覽餘悉焚之文皇靖難雅聞縉名拜侍讀學士階奉訓大夫初開文淵閣簡用七人備顧問以縉為首諭之曰爾七人朝夕相與共事鮮離左右朕嘉爾等恭慎故在宮中亦屢言之然恒情保初易保終難朕常存于心爾等亦宜謹終如故庶幾君臣保全

之美綰對曰陛下不以臣等淺陋俯垂信任敢不策勵
圖報上喜各賜五品公服又曰皇后欲召見爾七人命
婦其即令赴柔儀殿見之永樂元年十二月壬辰上御
謹身殿閱高祖御製文集諭綰曰皇考文章天資超邁
然亦學問所至觀其所著皆天地之心帝王之度語簡
理至藹然可見朕于宮中徧索宸翰不可得有言建文
君自焚時并寶璽皆毀矣意者其有遺帙乎綰對曰國
初佐命之臣理當有之於是遺書諸藩索之二年八月

已丑縉進呈大學正心章講義上覽之至再諭之曰人心誠不可有所好樂一有好樂泥而不返則欲必勝理若心能靜虛事來則應事去如明鑑止水自然純是天理朕每朝退默坐未嘗不思管此心為切要十二月進文獻大成賜宴禮部是歲文華寶鑑成上賜皇太子諭縉曰朕皇考訓戒太子嘗采經傳格言為儲君昭鑑錄朕此書稍加克廣益以皇考聖謨大訓以為子孫帝王萬世之法誠能守此足為賢君昔秦始皇教太子以法

律晉元帝授太子以韓非書帝王之道廢而不講此所以亂亡朕此書皆大經大法卿等兼輔東宮從容閒暇亦當以此為說庶幾成其德業他日不失為守成令主嗣後纂修高廟實錄及永樂大典命縉為總裁官先是上與淇國公丘福等二三大臣議建儲諸臣咸謂高煦有扈從功上不以為然召縉密議事遂定立仁宗為皇太子高煦為漢王加縉為學士兼右春坊大學士階奉議大夫未幾福等初議泄于外高煦知之憾縉獨深遂

諧于上曰藩邸舊臣無泄者其緡泄之乃坐緡廷試讀
卷不公罪出為廣西叅議既而禮部尚書李至剛誣緡
怨望改交趾八年入京奏事時車駕北征皇太子監國
緡伏謁徑歸高煦間之又諧緡私覲儲君無人臣禮復
竄交趾之化州檢討王偁在謫所邀與同趨廣東之化
州緡復上言請用數萬人鑿贛江上大震怒徵逮詔獄
拷掠備楚詞連大理丞湯宗中允李貫贊善王汝玉編
修朱紘檢討蔣驥潘畿蕭引高經歷高得暘及李至剛

相繼死獄中縉子禎應禎亮舉家俱戍邊仁宗登極特
宥還官其子禎亮為中書舍人縉襟宇曠略絕無城府
喜引拔士類如曾榮等二十八人俱所獎進太宗嘗命
縉評諸臣縉以實對於蹇義曰其資重厚中無定見於
夏原吉曰有德有量不遠小人於劉儁曰雖有才幹不
知顧義於鄭賜曰可為君子頗短於才於李至剛曰誕
而附勢雖才不端於黃福曰秉心易直確有定守於陳
瑛曰刻于用法好惡頗端於宋禮曰慙直而苛人怨不

恤於陳洽曰疏通警敏亦不失正於方賓曰簿書之才
祖儉之心既奏上以授仁宗曰李至剛朕洞燭之矣餘
徐驗之仁宗嘗問建文所用諸臣縉對曰此皆洪武中
人才往事不足論已問尹昌隆王汝玉曰昌隆君子而
量不洪汝玉文翰不易得所惜者市心爾縉卒後十餘
年仁宗出所評十人者示楊士奇曰人謂縉狂士乃今
知非狂士也楊士奇銘其墓曰千里之足越國過都或
一蹙之不虞梗楠百尋其才之蠱寧見捐于匠輸郁乎

紛紛五采承日競瞻望以忻快何泯沒之過疾干將地
下其神不死尚有光華天漢之涖廖道南曰縉負奇氣
抱雋才意興所到肆筆成章水搏蛟蚪陸剗犀象淵乎
其不窮浩乎其若有餘其自視何如者高皇網羅英俊
智屈羣策當時翊運元臣雖親如善長貴如廣洋惟庸
近侍如安如濂如觀如素雷霆所擊罔不震懾縉以一
少年上庖西萬言疏批鱗逆心罔所諱忌而聖度優容
令其進學才難之嘆猶可想見規模真弘遠矣召旋河

龍踐歷清華密贊建儲有故老舊臣所不及知而獨幹
運廟謨措神器于磐石視古英哲何以加諸然諫沮交
趾力抗權倖卒罹于讒莫之敢白悲夫贊曰董子三策
賈生萬言誓日遭迴遡風孤騫縉也奇才國士鮮儷遭
際真龍逆鱗弗諱河朔既竄日南載遷魂飛湯火殄瘁
疇憐文貞銘辭勃于貞石潛光益彰照耀方策

文淵閣大學士胡廣

胡廣字光大江西吉水人延平守子祺之孫永豐丞師

尹之子也幼受學于叔祖子貞及長之闕從黃仲器遊
建文庚辰舉進士第一賜名靖授修撰文皇登極簡用
儒臣入文淵閣擢侍講疏請復其舊名允之踰月改侍
講階承德郎上一日問百姓安否廣對曰郡縣窮治姦
黨外親深為民厲詔免寃賴全活者甚衆四年七月又
問曰昨有中官自江西來言田家刈稻已畢何獨大早
對曰臣鄉民多勤且多種早稻上曰勤之一字豈獨農
家為然至于人君尤當致勤於心朕每退朝靜坐必思

今日所行幾事果當於天理合於人情則心安矣否則中夜必思命左右記之俟旦改之蓋一事失當民受其弊故不得不勤爾廣對曰誠如聖諭未幾陟右庶子仍兼侍讀四年七月命撰神木山碑文皇太子立遷廣為學士兼右春坊大學士階奉政大夫諭吏部曰廣等侍朕日久繼自今秩滿勿改外任五年七月命同淇國公丘福等輔導皇太孫賜之勅諭略曰棟樑之建必由匠石之功圭瓚之成必假琢磨之力卿等皆懋簡德藝職

輔東宮東宮之子必資兼弼宜協心同志輔導于成推
廣仁義道德之源開陳二帝三王之治涵養本原恢弘
智量以成其德器庶國家有無窮之休卿等亦有無窮
之聞五年冬廣進呈文字上覽之稱善問曰黃淮不滿
于楊士奇何也廣對曰淮有政事士奇有文學蓋因解
縉重士奇輕淮故併及於臣上曰知汝不容于淮惟朕
不為所惑廣頓首謝六年七月命撰淳泥國恭順王碑
文七年二月甲戌聖學心法成諭廣曰古人治天下皆

有其要雖生知之聖亦資學問由唐虞至宋聖賢名訓具著經傳然簡帙浩繁未易遽領帝王之學惟得其要篤信力行足以為治朕惟皇太子天下之本今當進學貴在知要朕因機暇采輯古聖之學如執中建極切于身心家國天下者類為成書卿等試觀之廣曰帝王道德之要備載此書宜與典謨訓誥並傳萬世八年上大閱誓師聞銜喇特使者言諭廣曰國家無所用兵今日此舉非得已也廣對曰孔子所慎齊戰疾願致謹焉上曰

孔子人言我戰則必勝祭則受福誠敬之至效可必也
三月丙子上北征次凌霄峰諭廣曰諸將比來不進一
言何也廣曰成筭在上莫之能裨上曰好問則裕自用
則小雖聖人資于芻蕘朕曷敢任已以掩羣策暨旋師
廣等頒賚有差九年多罕台吉并女直野人來朝上諭
廣曰朕非欲併其土地良以此輩貪殘數為邊患來歲
賂以金幣剝民膏血若餌虎狼今既畏服授官賜賚捐
小費以弭大患可也十一月乙巳重修高廟實錄命廣

同胡儼等為纂修官十二年十月甲寅諭廣等曰五經四書皆聖賢精義要道其傳註之外諸儒議論有發明餘蘊者爾等采其精語增附於下其周程張朱諸君子性理之言如太極通書西銘正蒙之類皆六經羽翼爾等亦別類成編務極詳備庶幾可垂後世命廣為總裁官書成廣等撰表進呈上親製序文擢廣為文淵閣大學士時禮部郎中周訥建請封禪羣臣多從之廣撰却封禪頌以進上大嘉賞十六年五月嬰疾卒年四十九

仁宗登極贈官賜謚真章有云卿德行文學士林所重
事我皇考論思宥密十有七年清慎恭勤始終一節輔
朕春宮小心直諫今特加贈榮祿大夫少師禮部尚書
謚文穆仍賜其家金鈔文綺官其子種為檢討楊士奇
銘其墓曰經國所資文武並施惟武以靖惟文以治魏
巍太宗統御九有任武暨文如左右手公職詞垣十有
九稷秉恭執勤司帝之制玉冊金簡天章龍文光華日
星敷宣帝仁萬幾燕閒清問前席公所入告惟帝時懌

公所蓄志寬惠被下沕穆泯焉密贊鴻化春宮輔德平
直之行二聖惟明獨鑒公誠好文之朝儒林之首人聳
其瞻公眎無有泊虛之存簡肅之度彼其何心有好好
惡寵章駢蕃貢終猶始始終之全曠代其幾金螺在左
文江在右埋壁有光上貫斗斗廖道南曰國朝選士擢
冠於廷者自吳伯宗任亨泰輩受知皇祖至廣益大以
肆表章六經及性理諸書可謂有大造於後學者觀其
扈蹕帷幄之藹與夫典樞綸綽之文蔚然炳矣視文貞

以下鮮與其儷云贊曰東壁之躔月合星聯西崑之岫
玉澤珠懸彼美人兮龍見于田運逢九五風雲翕焉本
天親上上際九玄本地親下下徹九淵七俊廻翔頡頏
誰先宏猷秘畧公也則然

吏部侍郎兼學士曹鼎

曹鴈字萬鍾真定寧晉人曾祖克柔祖廷訓父祉咸隱
德弗耀鴈幼有遐志日誦數千言居常篤行事繼母備
極孝養初舉鄉薦中乙榜授代州學官疏辭不受銓曹

銜之改任泰和典史時中使旁午置郵無虛日鴈處之
裕如公暇即延禮師儒講明理性宣德壬子督部工匠
赴闕疏乞入試中第二人楊文真公一見竒之明年廷
試宣皇策以義禹河洛象數鴈對稱旨上親擢第一授
翰林修撰從楊文定公遊所得益深英廟初御經筵掄
選講讀官鴈首預焉數納明暢聞者聳敬預修宣廟實
錄轉侍講五年簡入內閣叅知政事甲子進學士乙丑
廷試讀卷得商輅為第一是歲陟吏部右侍郎仍兼學

士已巳五月戊申鴈奏侍講劉鉉修撰王振堪教庶吉
士修撰許彬郎中潘勤堪督四夷館從之七月俄聞額
森大舉入境中官王振力請親征上命武官英國公張
輔等文官兵部尚書鄺埜等及鴈與侍讀學士張益庵
從巡邊是月壬寅車駕次鷄鳴山癸卯次萬全峪是夕
金星犯亢甲辰次懷安是夕黑氣四塞乙巳次天城丙
午次陽和是夕火星犯土丁未次聚落驛戊申次大同
庚戌次雙寨王振蔚州人邀上幸其第辛亥次滴水岩

壬子次洪州癸丑次白登王振益恐迫挾進兵成國公
朱勇滕行聽命戶部尚書王佐竟日跪伏草中噤無一
語惟欽天監正彭德清首斥振曰象緯示警不可復前
若有疎虞陷乘與于草莽誰執其咎鵬繼之曰臣子固
不足惜主上繫宗社安危豈可輕進振怒詈之曰儻有
此亦天命也八月辛酉次土木命太監吳亮相地布營
陣未定敵已據南河次日敵僞退王振復矯制起營追
之大為蹂躪我師敗績死者十餘萬人鵬及諸臣五十

二員皆死之景帝聞之贈鴈榮祿大夫少傅吏部尚書
文淵閣大學士謚文襄遣官諭祭官其子恩為大理評
事英宗復辟加贈太傅改謚文忠又官其孫為錦衣百
戶廖道南曰予觀李忠文公及劉文安公奏疏謂自古
外國之禍未有甚于土木之難者夫漢之冒頓桀黠方
張唐之安祿泰養已久宋之遼金及元則又中國偏安
勢匪其敵我明當全盛之時王用三驅獲狐射隼而乃
受制閹豎親勞六飛至使全師覆沒善人殄瘁如鴈者

褒然為廷魁首元喪沙漠身膏草野不亦可悲乎予故
備述國史亦以為世鑒也已贊曰六龍北狩八駿西馳
龍沙遼邈狼山逶迤矯矯倫魁耿耿大節其身雖隕其
神猶烈人亦有言泰山鴻毛之子之死當辨秋毫

文淵閣大學士彭時

彭時字純道江西安福人正統戊辰進士第一授修撰
己巳英廟北狩郕王監國命時奪情起復入文淵閣陞
侍讀賜五品服時請終制不允值易儲遷左春坊大學

士寰宇志成陞太常卿兼侍讀天順元年九月上御文
華殿召時入見問年幾何時對曰夫馬齒四十有二上
笑曰年方壯可用也復命入閣兼學士時徐有貞既去
許彬薛瑄岳正呂原相繼拜命及李賢復入欲于閣中
南向坐時曰不可宣宗臨幸跡猶在也賢曰東閣何獨
正坐時曰東閣西向內閣南向恐非臣子所敢專且華
蓋謹身文華武英皆至尊所御設官兼殿止可侍坐備
顧問正坐非禮也賢語塞戊寅二月恭上聖烈慈壽皇

太后徽號時條上寬恤數事詔頒行之仍賜金綺有差
十月扈駕校獵于南海已卯賜遊西苑五月端午賜觀
騾騎七月賜遊南內庚辰上御南薰殿召時同李賢呂
原入命內侍鼓琴賜博帶十二月閱射西內召時同觀
憲宗即位陞吏部侍郎知經筵尋進兵部尚書兼學士
給假歸省遣中官護行因四川地震時上言十事賜麒
麟服總裁英廟實錄成加太子太保兼文淵閣大學士
慈懿皇太后崩時上言請如漢文葬呂后宋仁葬劉后

故事不報時同禮部尚書姚夔率百官伏文華門號泣
爭葬禮上感動從之戊子九月丙寅彗星見時上言正
宮闈廣儲嗣數事是歲改吏部尚書賜玉帶己丑冬無
雪時上言三事因及景帝固安公主及笄宜出嫁太監
劉永誠冒軍功不宜封以伯爵從之丙申十二月庚辰
時上言比者彗見天田西掃太微北近紫宮警懼謹告
可謂至矣因條上七事一曰正心術二曰謹命令三曰
親接見四曰慎賞罰五曰納諫諍六曰勵官守七曰恤

軍民上嘉納之是歲加少保卒贈太師謚文憲官其子
頤為尚寶寺丞廖道南曰予觀可齋記乃見文憲公之
貞朴非若文達公之多智也及讀國史謂時端慎嚴密
外和內剛立朝三十年未嘗不在公公退未嘗語子姓
以政事於乎今之君子何獨不然溫室之對可為永鑒
也已贊曰漢稱丙魏吉知大體唐稱姚宋璟能正已惟
明達務惟介知止於乎文憲無愧斯語

文淵閣學士階兵部尚書苗衷

苗衷字秉彝鳳陽定遠人永樂辛卯進士及第授編修
宣德初預修兩朝實錄轉侍讀正統紀元侍經筵預修
宣廟實錄進侍讀學士命入內閣典機務乙丑充廷試
讀卷官丁卯擢兵部侍郎兼前職戊辰廷試讀卷得彭
時為第一景泰初陟兵部尚書兼學士乞休景帝賜之
勅曰卿以科目高第發身事我皇曾祖考以至于朕凡
四十年厯官翰苑寅畏小心朕方進卿以大司馬兼翰
林長官冀有倚毗曾未幾時遽以老辭揆之古先哲王

求舊之美固不能忘而士大夫甘退之節亦不可拂特
賜寶鏤金綺給舟以歸以副朕懷賢念舊之意卒贈榮
祿大夫加少保賜文康子綬為監察御史廖道南曰予
觀中都志載苗文康素履弗得其詳及讀國史稱其為
人溫厚簡重外和內莊諳于世故樂道人善脩然有塵
外之意予始知文康之風遐哉邈矣贊曰嵩嶽龍從趨
于中都渾河洗洋風氣鬱紆乃生文康躋陟龍圖嬉笑
叱咤咳唾璣珠急流勇退上嘉兩疏國史如丹尚有嘉

謨

文淵閣學士贈禮部尚書馬愉

馬愉字性和山東臨朐人宣德丁未進士第一授修撰
正統初轉侍讀侍經筵預修宣廟實錄進侍讀學士庚
申命入內閣乙丑遷禮部侍郎兼侍讀學士嘗奏獻疑
獄多所平反兩考會試甄拔才雋人咸稱之忽晨起趨
朝仆不能語事聞即命醫往治越四日卒年五十三上
聞嗟悼賜棺槨賻錡萬緡命有司營兆域贈禮部尚書

兼學士舊例贈者無兼官兼之自愉始廖道南曰予觀
山東志謂愉淳雅寬厚行義可式及讀國史則又云端
重簡默自處澹如門無私謁於乎使居台揆者其門如
市其心如水亦何愧於愉哉贊曰青州之野長應虛危
倫魁之擢文炳壁奎商彭匪壽子淵匪天大化司之若
彼莽眇於乎若人八掌絲綸胡為遽隕天奪良臣天奪
之良不慙遺老鬼幽秘史丹青厥貌

文淵閣學士贈戶部尚書江淵

江淵字時用四川江津人宣德庚戌進士選庶吉士授
編修轉侍讀正統己巳陞刑部侍郎又改戶部侍郎兼
學士景泰辛未主考會試得吳匪為省元尋命巡視淮
徐諸郡淵條奏三事一准之常盈徐之廣運諸倉俱在
城外宜築月城以守之一天津為北河之會鳳陽為中
都之會宜放操軍以守之一河南為中原之要地北平
為京師之巨甸宜選民兵以守之疏上命所司議行尋
改吏部左侍郎景泰壬申以易儲事加太子少師入內

閣預機務英宗復辟刑于謙王文王誠舒良張永王勤
于市謫陳循江淵俞士聰項文曜充鐵嶺軍後石亨敗
復其官廖道南曰予觀景泰時陳循柄國凡厥有猷有
為者咸程厥能効厥用然而任怨太深操權太重怨叢
則衆怒權踰則主疑如江時用等才固可取而志亦可
恤也循之明於知人暗於知己又胡足恤乎贊曰西川
浩渺玉壘攸宗千崖屹嶻峨是宗驚靈為相杜宇為
辟子糾小白建成元吉君子於茲權其重輕師臣雖美

儲位當寧於手時用昧於時中鐵嶺之後請祝勲庸

文淵閣學士贈禮部尚書許彬

許彬字道中山東寧陽人永樂乙未進士選庶吉士授檢討宣德中秩滿轉修撰正統己巳曹鼐推舉提督四夷館九月陞大理少卿尋遷太常卿景泰庚午議遣近臣奉迎聖駕於沙漠彬毅然請行曰主辱臣死分也八月辛酉額森為土臺設座於上率衆膜拜奉辭太上皇進良馬貂皮遣得知院等護送至野狐嶺仍遣五百騎

送至宣府彬謁見太上命寫罪已詔勅諭文武羣臣仍
遣彬祭土木陣亡官軍英廟復辟遷禮部侍郎兼學士
入文淵閣叅知政事嘗薦王竑治河果有成績及石亨
專橫憾岳正忤已并及於彬調南京禮部未幾出為陝
西叅政亨敗乃復其官卒贈禮部尚書廖道南曰予觀
天順日錄及袁彬李實楊善紀行記乃知許道中之大
節亦不可誣也夫晉之懷愍宋之徽欽鑒興奔播于龍
沙哀藻蒙塵於狼胥良以中國諸臣狃于細節闇于遐

覽拘于瑣務暗于遠圖未有若我朝英廟之全福而諸
臣建策遠出晉宋之上如許道中者詞林中之翹楚也
贊曰龍庭荒漠六飛迴翔虎闕嚴悶萬乘趨蹌偉哉志
士捐生為國捧日以還赫赫業業推賢讓能綽焉有容
立名不朽於乎道中

文淵閣學士階禮部右侍郎薛瑄

薛瑄字德溫山西河津人曾祖常祖仲義皆通經教授
鄉里父貞領鄉薦為真定元氏教諭再調玉田母齊氏

夢一紫衣人入謁遂生瑄於學舍初生肌如水晶五臟皆露祖仲義聞其啼聲曰必異人也洪武己卯父貞改除馬湖吏目瑄撰平雲南賦黔國見而奇之永樂己亥父貞復除鄢陵教諭庚子瑄發解河南明年辛丑登進士宣德戊申授監察御史差監湖廣銀場手錄性理大全潛心誦讀深有所得著讀書錄正統紀元擢山東僉事提督學政首以朱子白鹿洞規開示學者講明理性多所造就楊文真公薦之入為大理少卿撰大理箴以

自警時太監王振專柄錦衣指揮馬順附之會有百戶
病死其妻誣妻殺其夫瑄白其冤都御史王文譖之于
王振振怒嗾言官劾之詔逮之獄處以大辟兵部侍郎王
偉申救除名放歸正統己巳給事中陳信薦起為大理
寺丞命督餉貴州戶部侍郎江淵薦之陞南京大理卿
蘇州有饑民火富室之廬者王文復往按其事坐以謀
逆連及五百餘家瑄又白其冤文謂人曰瑄崛強猶昔
瑄曰辨冤獲咎又何憾焉既而執之愈力賴以平反者

金人正史卷之三
甚衆天順初都御史楊善薦之特召為禮部侍郎兼學士入內閣一日英宗御便殿召瑄入語移時諄諄啓沃皆有關於聖學君德者是科命主考會試瑄以復性為問得劉定之為省元時曹石冒功亂政瑄曰君子見幾而作寧俟終日耶即上疏乞休卒年七十六子四人孫祺舉進士李文達公銘其墓曰昔有王氏鳴道河汾流風餘韻以啓休聞乃若薛公不以自足濂洛關閩意向甚篤稽其出仕實始為親敎歷中外進學日新學既日

新道亦有得身體力行至無少息操履堅定外物不移
中心自固夫豈有私富貴利達患難貧賤隨處而安曷
有歆羨成就後學大小不遺由粗而精以隨其質嗟今
之人無公所好公今已矣誰臻其奧廖道南曰予幼誦
讀書錄以為程朱語錄之後即有此書及觀國史乃見
劉文安公定議謂瑄直躬慕古談道淑徒進不附麗退
不慕戀允為一代名臣然論其於朱熹之學未若黃榦
輔廣之親承微言金履祥許謙之推行緒論推之從祀

似亦為過也彭韶贊曰力行好古進趨有程寤寐河洛以究春陵厥歷中外大棘之卿縲綆非罪復起而丞貳卿掌制以弼以承豈寶遠物而志可行乞年以退惟道之損

文淵閣學士兼右春坊大學士呂原

呂原字逢原浙江秀水人父嗣芳為萬泉教官卒於任原孤貧假館養母郡守黃懋舉充邑庠生正統辛酉鄉薦第一明年進士及第授編修癸亥預修五倫書賜寶

鍾丁卯被選進學東閣侍經筵景泰初遣祭於蜀歸充
經筵講官轉侍講壬寅遷右中允兼侍講是秋進侍講
學士兼中允癸卯預修歷代君鑑錄主考順天鄉試乙
巳預修寰宇通志明年擢右春坊大學士仍兼侍講天
順初改通政司左叅議兼侍講主考會試時徐有貞既
黜薛瑄請老乃特用李賢并召原與岳正入內閣命原
兼學士總裁一統志成有金帶玉杯之賜壬午守制歸
躬視母塋哀毀踰節期年卒年四十五贈禮部侍郎謚

文懿子憲為太常卿廖道南曰予觀楊文懿公誄原之
文有曰繫樞李之鍾秀兮挺碩人其碩碩植仁義以為
本兮橫百行以為枝劉文安公輓原有曰君子非始之
難而終之難若公之終孝不忘於其親則無愧於其君
矣蓋嘆逢原之學所從來者遠矣及國史所載謂其為
人寬厚不立崖岸事母撫孤克盡孝友其在內閣多所
裨益郡志亦稱其內端外和與物無競程篁墩文葺遺
事謂居官二十年家無田宅為學務實踐不事多言蓋

皆實錄也贊曰橋李之域龍淵是名嘉禾之秀虎觀有
人惟陸宣公為唐內相惟呂逢原為明人望文懿所誅
文安所哀於乎已矣上燭中台

文淵閣學士贈禮部尚書王一寧

王一寧字

原闕

浙江仙居人十三能詩父峻任國子監

丞一寧從侍時仁宗在春宮聞其善撫琴召見命賦銀
河詩嘉之俾就國子監讀書永樂戊戌舉進士授吏部
稽勲主事於文華殿供事秩滿改修撰曹鼐薦教庶吉

士萬安等預修宣廟實錄成轉侍講兩命為京闈考官
正統戊辰遷禮部右侍郎景泰初勅往湖廣督理軍餉
明年召還轉本部左侍郎兼翰林院學士命入內閣預
機務以中官王誠革嘗受業報其私恩也壬申易儲進
太子少師仍兼舊職尋卒於官贈太子太保禮部尚書
謚文通廖道南曰古之豪傑之起也固不拘其類後世
則不然乃若王伾王叔文李訓鄭注之儔或以他伎進
卒敗其身而動搖宗社故曰君子未嘗不欲仕也又惡

不由其道王君始由狎客射策甲科終由佞幸絲綸秘閣君子奚取焉亦以寓勸戒焉爾贊曰天台窈窕赤城霞標鴈蕩摩雲龍湫噴霄允矣王君夙穎垂髫鼓琴潛邸校藝京寮卒階崇秩德音奚昭

文淵閣學士階戶部尚書蕭鑑

蕭鑑字孟勤江西泰和人宣德丁未進士選庶吉士授編修正統初預修宣廟實錄轉侍讀未幾陞祭酒勤于訓士矩度整肅嘗欲乞歸監丞鮑相合師生三千餘人

金史卷之三
卷三
慰留如陽城景泰辛未召入文淵閣兼學士尋擢戶部
侍郎命議易儲事鉉曰無易樹子霸者所禁況天朝乎
不聽加鉉太子少師因天變上疏論時政甚切修寰宇
通志充總裁官書成陟戶部尚書加太子太師仍兼學
士廖道南論曰予觀邱文莊贊辭謂鉉蒼然古色淵然
德光進有所施舍可以藏知鉉為可人也及讀國史稱
鉉言動溫雅性多猜忌遇事亦多退避方景泰易儲時
則顯言以爭及加官秩則又覲顏以受是遵何德哉贊

曰文江之源靈氣鬱蟠仁山之麓英人挺生傑哉孟勤
幼抱巨志繼踐金華徘徊廊宇時政有疏秘省有書力
爭易儲德也不孤

文淵閣大學士陳文

陳文字安簡其先湖廣茶陵人有名蘭孫者其仲子欽
徙居江西之廬陵文幼警敏甫弱冠即魁多士正統丙
辰進士及第授編修癸亥被選東閣進學士己巳秋滿
轉侍講景泰庚午主考順天鄉試以高文毅公薦補雲

南右布政轉廣東左布政天順改元召旋拜詹事癸未
遷禮部侍郎兼學士入內閣甲申改吏部左侍郎與李
文達彭文憲同心輔政成化乙酉陟禮部尚書總裁英
廟實錄加太子少保文淵閣大學士卒年六十四贈榮
祿大夫少傅謚莊靖官其子璋為中書舍人廖道南曰
予觀劉文安所著陳莊靖傳邱文莊所撰哀辭咸謂文
出厯外藩入長宮端受密命贊化權謨謀毗益眷注日
隆及觀郡志亦稱為一時之能臣而國史小傳則寥寥

數語於乎若人者吾奚得而名狀之哉贊曰文達之才如崇通變文憲之介如璟守正莊靖於時同心輔政無言無爭惟寧惟靜出歷二藩入踐三台周旋曲折亦已焉哉

文淵閣學士階兵部尚書尹直

尹直字正言江西泰和人景泰甲戌進士選庶吉士授編修轉侍讀直上言典章制度必大備于文明之朝著述纂修當不廢于承平之世我祖宗神功聖德雖登于

秘史其儀文法制未載于全書雖有諸司職掌然遺畧尚多更革不一欲示永久曷粹大成乃若通鑑綱目起自周威烈王迄於五季茲宜續修以成巨典上是其言尋進侍講學士上言災異修省三十二事轉吏部侍郎兼學士入內閣加太子少保兵部尚書兼學士主考會試得程楷為第一是科得人最多如蔣冕費宏劉春毛紀時江右李孜省用事鄉宦多附誣之直密與通但其斥中使李穀之誣辨御史吳珍之寃人又稱之卒謚文

和廖道南曰予讀直所撰瑣綴錄力詆吳與弼之為人及諸勝已者悉加媒孽心竊疑之既而讀國史狀直之心如其所撰者不爽也贊曰大江之西吉水之濱英才疊出多為名臣直負修能屢有啓沃論史有疏瑣綴有錄顯斥與弼潛附攷省國史如丹洞燭幽隱

文淵閣學士階禮部尚書彭華

彭華字彥實江西安福人景泰甲戌會試第一選庶吉士授編修天順中以多支廩餼坐除名賴大學士李賢

赦免成化初轉侍讀充經筵日講官進侍讀學士預修
宋元綱目成陞學士文華大訓成遷詹事兼學士丁未
陞吏部左侍郎仍兼學士入內閣尋加太子少保禮部
尚書先是江右李孜省以小吏致位卿佐華私附之又
與大學士萬安結為心腹以故肆讒投間亟亟若狂如
尚書李秉王恕馬文升秦紘侍郎邢讓祭酒陳鑑與其
同鄉劉宣羅璟相繼斥逐華之力居多未幾與疾歸卒
謚文思廖道南曰予觀吉安志謂華才識超邁望重一

時及讀國史累千百言皆極其醜詆又謂羅倫之逐張元禎之劾皆原于華予不敢盡信姑存其著者贊曰漢之廣受咸事儲皇宋之郊祁並擅文場乃若二彭蓋簪玉堂文憲何猶文思何狂既味介石猶慚復隍彤管紀之云胡不臧

文淵閣學士贈禮部尚書劉定之

劉定之字主靜江西永新人正統丙辰會試第一明年進士及第授編修正統己未六月定之上言十事一曰

謹號令二曰察人才三曰處降夷四曰重守令五曰杜
奔競六曰訓武官七曰嚴考課八曰惜名器九曰遵服
制十曰禁淫奔疏上留中秩滿轉侍講景泰庚午定之
上言自古邊疆之禍未有甚于今日者昔晉懷愍陷於
匈奴宋徽欽陷于女真皆因遙塞外破藩鎮內潰救援
不集播遷無所未有若今日舉天下之大合數十萬之
衆奉上皇於沙漠委以與衛喇特者也晉宋既遭此既之
後元帝繼統高宗嗣服皆舍棄舊都偏安一隅尚能奮

既衰之勢振方張之敵未有若今日額森入侵直抵京城奉上皇以來而天下之大數十萬之衆聽其自來又聽其自去者也謹條上十事一曰戰陳二曰守禦三曰通使四曰降番五曰練兵六曰撫民七曰選將八曰賞罰九曰議政十曰德學景帝嘉納壬申遷司經局洗馬定之又上請遣使奉迎命禮部會議行之丙子轉右春坊右庶子天順紀元改通政司左叅議兼侍講是冬進學士甲申遷太常少卿兼侍讀學士充副總裁官成化

丙戌簡入內閣叅預機務明年秋陞工部右侍郎又明年轉禮部左侍郎俱兼學士卒年六十一贈資善大夫禮部尚書謚文安李文正公叙其集曰譬之山焉出雲雨產寶玉生材木禽獸而朽株糞壤亦雜乎其間斯足為嶽為鎮譬之水焉吞吐日月藏蓄魚龍變現蛟蜃而汚泥濁潦受之而無不容斯足為江為河為海若勺鍬字鍊探之有窮取之無餘不過為孤峰絕澗而止惡足以其大哉文安伸紙運思揮毫對客正書旁竄晷不

移刻稿不易幅及登秘閣析疑義稽古訓或日詠百詩
或一揮九制淳泓演迤頓挫奔放奇正並用變化不窮
昔漢劉向宋劉敞皆博極羣籍未見於用若文安晚始
大用用亦不久功業未竟而其文大鳴于時固一代之
盛哉廖道南曰予自兒時五洪家君嘗誨以文安之受
教於石潭君也雖古人亦無踰焉乃取果齊諸稿讀之
郁郁乎盛矣及閱國史乃見其昌言直氣卓不可撓沛
不可禦昔人所謂此皆節義文章可相屈耶惜乎用之

既晚未究厥施西涯其知言哉彭韶贊曰天資絕倫八面受敵高古渾雄變化莫測經筵講官太子洗馬三疏抗言援筆立寫惟公之文名重天下豈但當時愛而不捨至今後人詞林定價

文淵閣大學士劉珙

劉珙字德溫山東壽光人正統戊辰進士選庶吉士授編修景泰丙子預修寰宇通志轉修撰天順改元遷右中允侍東宮講讀憲皇登極以宮寮舊臣擢太常少卿

兼侍讀預修英廟實錄進太常卿兼侍讀學士甲午陞
吏部侍郎充經筵日講官乙未簡入內閣兼學士丁酉
陟戶部尚書明年加太子少保文淵閣大學士文華大
訓成加太子太保光祿大夫柱國時妖人李孜省輩左
道亂政動搖國本珣力爭之無少避謀遂沮然亦以此
不安於位或搆以飛語假俳優以中傷之珣遂乞休詔
允之卒諡文和子銳為太常卿廖道南曰予觀東土志
謂珣事親孝母沒廬墓時父曷在珣昧爽問安畢復詣

墓所郡守李昂表其里曰仁孝豈即昌黎所謂出則秉
笏垂魚入則侍安問膳者耶於乎孫子之昌固有本矣
贊曰泰山蜿蜒滄海滂洋靈精灝氣鍾於壽光惟彼文
和其餘不家孝以事親忠以遇主抗疏辭榮幽栖雲門
令聞不泯有德斯存

殿閣詞林記卷三

欽定四庫全書

史部

殿閣詞林記卷四

詳校官侍讀_臣陳萬青

刑部郎中_臣許兆椿覆勘

總校官進士_臣繆琪

校對官編修_臣莊通敏

謄錄監生_臣王宜

欽定四庫全書

殿閣詞林記卷四

院學

翰林院學士封姑孰郡公陶安

陶安字主敬太平當塗人幼穎敏有大志通判馬昂夫
令賦喜雨詩立就奇之自是肆力問學博極羣書得程
氏讀書日程及呂舍人學規益究心濬洛沉潜道藝元

明 廖道南 撰

至正甲申舉浙江鄉薦為明道書院山長再調高節書院講明朱陸之學乙未夏六月朔高皇帝渡江至太平安偕耆儒李習率父老迎謁驚相謂曰龍姿鳳質非常人也我輩今有主矣上召見與語安因說曰四海鼎沸豪傑並爭悉多攻城屠邑志在子女玉帛爾非有撥亂救民安天下之心明公率衆渡江神武不殺人心悅服應天順人以行弔伐天下不足平也上曰爾言甚善吾欲取金陵何如安曰金陵古帝王都龍蟠虎踞長江天

整取而有之撫形勝以臨四方所向無敵何憂不克此
天所以資明公也上甚悅乃改太平路為府命習知府
事以安叅謀拜左司員外郎丙申克金陵乃陟本司郎
中先是劉基宋濂章溢葉琛來謁上問安孰賢安曰臣
謀不如基學不如濂治民之才不如溢琛遠甚上嘉其
讓已而克武昌乃以安知黃州府事尋改令桐城知饒
州府事時閩寇攻城急安諭衆固守援兵至圍解諸將
以民多從寇欲屠之安曰民被脅誘非其本心賴以全

活甚衆民為立生祠上親製詩勞之

詩曰匡廬岩穴甚
濟濟水怪無端盈

彭蠡鰐魚因韓去遠
洋陶安鄱陽即一理

吳元年始置翰林院開禮樂二局

首召安為學士凡制度儀章悉安草創上錫之誥命有

曰國家之立必有一心之臣遵戴匡輔用能張紀綱植

表儀正名位善辭命基圖丕安朕初渡江卿安首謁軍

門即期以帝王事功贊襄兵務多厯年所宣號令則軍

民信義禮樂則體要成建陳以忠出納惟允捍城禦侮

勞績茂者朕甚嘉焉廼者開翰苑以崇文治設學士以

冠儒英重道尊賢莫先於爾擢居宥密俾職論思錫以
寵章用昭國典尚勤獻納贊我皇猷綜理人文以臻至
治可翰林學士嘉議大夫知制誥兼修國史洪武元年

修大明律令成為總裁官上親製春帖褒之

帖曰國朝
謀畧無雙

士翰苑文
章第一家

遂拜江西行省叅知政事上諭曰卿安遇朕

數陳王業幕府軍旅裨益良多繼入翰林日間譙論茲
以江西地居上游可代汪廣洋者宜莫如卿安辭曰臣
恐付託不效有孤渥恩上曰躬擐甲冑決勝負於兩陣

間此武夫之事儒生非所能若承流宣化綏輯一方此
儒者之事非武夫所能也卿才宜是任吾豈私一人弗
愛一方乎乃錫以誥命追封其祖父為姑孰侯秋九月
癸卯卒年五十九追封為姑孰郡公安為人外癯而內
實精於易數為文純雅疏暢力追古人一日侍上論學
術安曰道之不明邪說害之也上曰邪說害道猶美味
悅口美色眩目人鮮不為所惑非有豪傑之見不能決
去之也戰國之時縱橫捭闔類皆游說諸侯急於功利

者多從其術事未就而國隨以亡此誠何益夫邪說不
去則正道不興正道不興天下焉得而治安對曰陛下
所言深探其本上曰仁義治天下之本也賈生論秦之
亡不行仁義之過夫秦襲戰國習弊又安知此安頓首
謝其所啓沃類如此廖道南曰漢初逐秦羣雄紛擾靡
克定一至董公說以仁義其興也勃焉我高皇起應昌
運遠超於漢方其奮跡濠梁取滁和渡采石定當塗陶
安謁見期以王道決計趨金陵肆居帷幄英謨密議幽

贊神明且言邪說害道其見遠哉弘遠矣可不謂一代
儒宗爾矣乎彭韶贊曰濂洛關閩灼有定式屏跡江南
授徒考德適遇天兵來皇斯域謀猶無雙王業是職都
陽有成翰苑之陟律以表民文以華國

翰林院學士朱升

朱升字允升徽州休寧人後徙歙之石門幼師鄉進士
陳櫟櫟深器之元至正癸未間資中黃楚望講道湓浦
偕趙訪往學焉既有得乃歸讀書紫陽祠中乙酉舉鄉

薦授池州路學正壬辰淮南蕪黃兵起升所居窮僻雖
避兵逋竄詞述不輟脫去俗學直造本真究極玄微覃
精大道丁酉夏六月高皇帝遣元帥胡大海等至徽改

徽州路為興安府升被徵入見顧問稱旨

上問之對曰
高築牆廣積

種緩稱上
嘉其朴

遂叅密議凡禮樂征伐典章文物多所贊畫

吳元年丁未拜侍讀學士中順大夫知制誥同修國史
上親製誥詞有曰春我同宗之老實為耆哲之英無何
乃陟為本院學士特免其朝謁以優禮之洪武元年二

月乙卯上御東閣顧謂升曰近觀周禮有所謂六夢者
朕嘗感異夢厥兆維何升對曰人之精魄上通於天此
陛下受命之兆也軒轅夢遊華胥天下大治帝王之興
自有天命蓋振古如茲矣三月辛未命儒臣修女誡又
諭升曰治天下者修身為本正家為先始于謹夫婦后
妃雖母儀天下不可使預政事至嬪嬙之屬不過備職
事侍中櫛若寵之太過恐驕恣犯分上下失序歷代宮
闈政由內出未有不為禍本者夫內嬖惑人甚於鴆毒

惟明主能察於未然其他鮮不為所惑卿等為朕述女
誠及古賢妃之事可為法者示後世子孫有所持守升
受命纂輯二年三月戊戌復命撰齊戒文是月請老歸
石門乃居梅花初月樓上親灑宸翰以賜卒年七十二
學者稱為楓林先生所著有易書詩周禮儀禮禮記孝
經四書小學旁註及書傳補輯諸書傳解行於世廖道
南曰予幼從石門大夫學即誦楓林小四書迥然異之
及覽觀諸經旁註慨然興嗟以為道可即矣石門大夫

仍復示以玄旨約之精義乃今知朱允升之學要亦切當不可誣也贊曰矯矯耆儒紫陽之裔文不喪天道未墜地乃究淵源好學篤志躬遇真人風雲景會乃攷禮樂乃新規制樂道石門始終一致

翰林院學士宋濂

宋濂字景濂浙之金華人兒時即抱鉅人志日記五千言既長受春秋于聞人夢吉學古文于柳貫黃潛吳萊之門講道於浦江之青蘿山著書號龍門子元以國史

編修徵辭不就高皇帝定鼎金陵遣使聘至建禮賢館以居之初為儒學提舉陳友諒平乃撰平江漢頌上大稱賞遣世子受經甲辰十月轉起居注上御端門論黃石公三畧濂曰尚書二典三謨帝王大經大法具載願皇上講明是書心學復傳矣上曰朕非不知典謨為帝王大道顧三畧為今日攻取急務爾時中書省臣奏請給牛種於民上令勿徵其租乃謂濂曰朕所言當乎濂曰民富則君不至獨貧民貧則君不至獨富捐利予民

實興邦要道也乙巳三月漁卧病館舍上曰老宋起居
何久不見繼聞在告乃憂形于色曰宋起居誠篤之士
不參以分毫人偽侍予五年猶一日也乃謂侍臣曰爾
往傳命俾歸金華山中父子祖孫懽然同聚疾必速愈
愈且速造朝國家文翰庶有賴哉乃贐以金幣皇太子
致贈有加焉漁歸上表謝并奉書東宮勉以孝友恭敬
母情母縱愁修德業副天下望上覽書喜甚召太子諭
曰吾自幼備歷艱難今爾曹冠服華麗飲食甘美安居

深宮不知勇於進修是自棄也宋起居言有益爾其味
之且酬之以御劄曰先生教吾子以嚴是不佞也以聖
人文法變俗教之是不固也以忠厚立心以節儉制行
是得體也昔聞古人乃今見矣仍以文綺侑書洪武二
年瀛終喪詔修元史以濂為總裁官兼修禮書六月陟
翰林學士知制誥三年二月辛酉上御東閣濂等進講
大學至有土有人反覆陳說上曰人者國之本德者身
之本德厚則人懷民安則國固故仁主有仁愛之德則

人歸之如就父母人心既歸有土有財自然之理也若
德不足以懷衆雖有財亦何用哉七月元史成賜金幣
有差時甘露屢降瀛撰頌其末有曰受命不于天于其人
休符不于祥于其仁孔子作春秋祥瑞不書有年則書
豈不以天道難知人事可徵者乎皇上留神至治以得
仁賢為瑞以臻和豐為祥視前代植金莖以承液誇嘉
瑞以紀年者不侔矣上嘗論古帝王宴安之餘多嗜神
仙瀛曰漢武好神仙方士至梁武好佛異僧集使移此

心求賢為治天下其有不平乎上姪文正獲罪且不測
漁曰文正罪固弗宥皇上廣親親之恩生之而置諸遠
地斯善矣上既追封外王父為楊王立廟將服袞冕以
祭漁曰袞冕惟天地宗廟用餘則當降禮也上從之命
漁撰楊王廟碑後失朝左遷編修十一月轉國子司業
四年七月坐考祭禮遲滯與魏觀同謫漁為安遠令十
一月召還為禮部主事是年明昇貢異馬乃撰龍馬贊
五年六月嘉瓜生于句容撰嘉瓜贊十二月丁酉復以

濂為太子贊善大夫六年正月以舉人張唯等為編修
入文華堂肄業命濂為之師上聽政之暇輒幸堂中評
文優劣每食太子親王迭為之主是月昭鑒錄成八月
寶訓成十二月日厯成俱命濂為序上問帝王之學何
書最要濂以大學衍義對上命書於兩廡壁時睇觀之
因覽史記論黃老事命濂講析濂曰人主能以義理養
心則邪說不能侵興學校教民則禍亂無由作矣上曰
朕上畏天地下畏兆民兢業不敢自逸對曰陛下此心

古先哲王之心也慎終如始斯無間矣乃復以瀛為侍
讀學士七年十一月孝慈錄成八年三月洪武正韻及
大明律成瀛俱為總裁官五月丁丑上御端門出內庫
蟠桃核示詞臣命瀛為賦九月侍皇太子親王遊中都
瀛隨處開說多所規益既歸上謂瀛曰皇太子留心治
道卿等居常諷諭庶廣識見幸善調護之上於後苑觀
穫曰農事成矣瀛曰國以民為本民以食為天皇上知
稼穡之艱難念民生之疾苦實盛德也九年五月上御

奉天門謂漁曰自古有國家者未有不資賢才而能獨
理秦之時張良陳平韓信皆隱屠釣漢高卒用以成帝
業今山林巖穴豈無超羣拔衆之才茲欲羅而致之其
道何繇漁曰取士莫善於鄉舉里選用人莫善於任官
任官莫善於久居不遷古有是論而陛下行之得才之
效無過此矣是月復命為學士承旨知制誥如故十年
三月致仕上賜絳帛文綺及御製文集皇太子贈衣二
襲上曰朕慎于賞予卿誠貫金石故以是賜卿今年幾

何對曰六十有八上曰藏此綺俟三十二年作百歲衣也濂辭行上復曰江漲不可舟卿宜循內河庶保無虞矣九月來朝上勞之曰卿去此數月朕思之今卿復來朕恐失顧問特遣禮官致餽卿當引觴自酌食以養神又親調甘露以賜之曰酌此可頤壽康也是日侍遊禁苑日晏始退上嘆曰純臣哉爾濂今四夷皆知卿名卿其自愛濂謝不敢當十月觀心亭成復命濂為記濂自布衣感上龍飛之遇凡有任使夙夜匪懈虔恭勤慎凡

郊社宗廟山川百神之典禮樂律厯名物度數之制四夷朝貢賞賚之儀及勲臣碑碣銘誌之文承上意旨即時撰次常曰君猶父也天也其可欺耶上欲命叅大政辭曰臣少無他長惟文墨是工不敢當是任上愈厚之每燕見必命坐賜茶每旦令侍膳或召問廷臣臧否第稱其善者漁素不能飲上強之飲至再面赭行不成步上賦詩一章賜之仍命羣臣咸賦醉學士歌曰俾後世知朕君臣同樂至此也因漁艱於行步詔皇太子選廐

馬以賜上復賦良馬歌命羣臣咸賦以紀之有上萬言
疏者上怒欲重其罪濂曰彼應詔陳言未可深罪上默
然已而釋之其扶植善類類如此上嘗謂廷臣曰古之
人大上為聖其次為賢其次為君子宋濂事朕十有九
年未嘗有一言之偽誚一人之短寵辱不驚始終無異
君子哉若人乎抑亦可謂賢矣濂子璉為中書舍人孫
慎為儀禮司序班十三年璉因事連坐有司請罪濂上
念濂舊臣乃安置于茂州卒于夔州所著有龍門子凝

道記潛溪集鑒坡前後集翰苑續別集芝園集朝京稿
蘿山集浦陽人物記廖道南曰天降時雨山川出雲國
家將興必有禎祥若景濂者非天啓之以朔初運者乎
予嘗讀楊維禎序景濂之文曰其隱龍門也煜乎其虎
豹煙霞也其居館閣也燦乎其鸞鳳日星也貝瓊曰正
聲勁氣充塞宇宙星辰河漢山川草木風雨雷電鬼神
變化龍跳虎躍瑰詭奇絕揭沉曰浩乎其博濶乎其深
蔚乎其色鏗乎其聲春濤之瀾漫也鐵騎之縱橫也武

庫之珍異也龍門砥柱之可駭也蓋論其文者然也至其門人方孝孺稱之曰公之量可以包天下而天下不能容公之一身公之識可以鑒一世而舉世不能知公之為人道可以陶冶造化而不獲終于正寢德可以涵濡萬類而不獲蓋其後昆公之所能者皆衆人之所難勉而未嘗自以為足其所遇者皆衆人之所難處則快然委命而不置乎休戚此公所以跨越前古拔羣超倫控宇宙而獨立後天地而長存者乎可謂知言矣彭韶

贊曰春日載陽列宿繁張江流湯湯是為先生德容之粹文名之高學問之長禦敵輔夏正我綱常功在萬世其曷敢忘

翰林院學士劉三吾

劉三吾名昆孫以字行長沙茶陵人兄耕孫壽孫皆事元三吾少習舉子業元季避兵廣西行省授靖江教授儒學副提舉王師克廣西乃歸茶陵洪武十八年通政衡山茹瑄薦其才可大受乃以為左春坊左贊善三吾

年已近老博覽善記應對詳敏屢承顧問悉多稱旨七月戊寅上問侍臣以民生安否三吾對曰賴陛下威德四方無虞盜賊屏息歲比豐登民咸安樂上曰天下之民之衆豈能保其皆安朕為天下主心常在民惟恐失所每加詢問未嘗一日忘之三吾曰聖心拳拳若此恩德之及民者深矣上曰恩德亦非汎然譬如盧扁不施藥石疾不自廖匠如公輸不施繩墨木不自正君如堯舜無紀綱法度之施而但曰恩德所謂徒善不足以為

政也上嘗命儒臣編集歷代帝王祭祀祥異感應可為
鑒戒者萃為一書名曰存心錄命三吾編集漢唐以來
災異之應於臣下者別為一書名曰省躬錄二十年二
月甲辰御註洪範書成上謂三吾曰朕觀洪範一書帝
王為治之要道也所以叙彝倫立皇極保萬民叙四時
成百穀本於天道驗於人事箕子為武王陳之武王猶
自謙曰五帝之道我未能焉朕每為惕然遂疏其旨朝
夕省覽三吾曰陛下留心是書上明聖道下福生民為

萬世開太平者也遂命三吾撰序二十一年五月乙酉
五色雲見三吾進曰雲物之祥徵於治世舜之時興於
詩歌此實聖德所致也上曰古人有言天降災祥在德
誠使吾德靡悔災亦可弭苟與其德雖祥無應國家之
慶不專於此也二十二年十一月乙丑朔上御謹身殿
因論治民之道三吾曰南地風俗不同有可以德化有
當以威制上曰地有南北民無兩心帝王一視同仁豈
有彼此之間君子懷德小人懷刑施之各有攸當焉爾

十二月癸亥上謂三吾曰愚民犯法如啗飲酒嗜之而不知止設法以防其犯而犯者益多推恕以行吾仁而仁或可濟三吾曰三代而上刑罰常簡本仁恕也三代而下刑罰常濫以嚴刻也上曰善為國家者惟以生道樹德不以刑殺立威二十四年七月命攷定武臣封贈之制十一月上御武英殿觀書至惠迪吉從逆凶乃曰凡人罹凶咎無不自己求之者彼事勢窮促冀求苟免竟亦何益三吾曰如是者當聽乎天上曰心無所愧可

聽於天若其自求於天何預二十七年正月辛巳上退
朝謂三吾曰朕厯年久而益懼者恐為治之心懈也懈
心一生百事皆廢生民休戚係焉故日慎一日惟恐弗
及如是而治效猶未臻甚矣為治之難也自古先王之
治必本於愛民然愛民而無實心則民心不蒙其澤民
不蒙澤則衆心離于下積怨聚于上欲國家不危難矣
三吾曰陛下之言及此天地神人之福也三月辛丑又
謂三吾曰人主之聰明不可使有壅蔽一有壅蔽則耳

目聾瞽天下之事難達矣三吾曰人君惟博采衆論任賢使能則視聽廣而聰明無所蔽若信任儉邪隔絕賢路則視聽偏而聰明為所蔽也上曰人主以天下之耳目為視聽則是非無所隱而賢否自見昔唐玄宗內惑于聲色外蔽于權奸以養成安史之亂及京師失守倉惶出幸雖田夫野老皆能言其必有今日者玄宗雖恍然悔悟亦已晚矣夫以田夫野老皆知而玄宗不知其蔽於聰明甚矣使其能廣視聽任用賢能不為邪佞所

惑則亂何從生哉七月己酉上因改定書傳謂三吾等
曰朕每觀天象自洪武初有黑氣凝于奎壁今年春暮
其氣始消文運當興爾等宜考古證今有所述作以稱
朕意於是禮遇諸儒甚厚各賜以綺繒衣被又御製詩
命次韻和之朝叅則列於侍衛之前燕享則坐於殿中
仍以朝鮮所貢玳瑁筆賜三吾及修寰宇通衢書禮制
集要成俱倍加賞賚三十年命三吾主考會試北士偶
黜竟以是獲罪三吾為人慷慨坦夷不設城府自號曰

坦坦翁至于大節則屹乎其不可奪也上嘗欲易太子
三吾痛哭曰太子天下本若欲易之置秦晉二王於何
地事多忤旨降為博士久之乃復為學士廖道南曰可
以託六尺之孤可以寄百里之命臨大節而不可奪若
三吾者非其人與方茹忠誠之薦也聖祖虛席以待而
密勿啓沃格心居多至於易儲痛哭以爭可不謂節乎
贊曰星沙之南雲陽之墟嶽祇發祥是生鴻儒惟彼鴻
儒台輔之器學顏之學志尹之志晚登秘省嘉謨嘉猷

嗟予小子景慕前修

翰林院侍讀學士張以寧

張以寧字志道其先河南固始人厥祖光祿大夫從王
審知入閩遂居福建之古田少貧苦嗜學登元泰定辛
卯進士初授黃巖州判官轉六合縣尹坐事免至正中
復起為國子助教後遷待制侍讀學士以寧有俊才元
末遺老多物故以寧獨擅名于時人呼為小張學士國
初王師入元都以寧與危素等以故官來歸奏對稱旨

仍以為侍讀學士階朝列大夫知制誥特被寵遇洪武
己酉與典簿牛諒奉使安南上親製詩送之時安南王
陳日燧偶卒嗣君日熈遣其臣阮亮求詔璽以寧不許
乃留居洱江俾諒往其國諭以朝廷威福彼遂復遣陪
臣杜舜卿來告訃上親御翰墨為祭文命編修王廉主
事林唐臣往將命事竣上御製詩八章暨錫以璽書褒
之還卒于道中詔有司還其柩于家所在致祭以寧清
潔自守所居蕭然未嘗營財產其奉使也襆被而往臨

終時有詩云覆身惟有黔婁被垂橐都無陸賈金有詩
文數十卷號翠屏集子煜為蒲圻知縣炬為刑部員外
郎大學士楊榮銘其墓曰世德相傳厥為名族固始徙
閩肇於光祿積善流慶懋敏文儒鬱如喬松溫若美瑜
富有才華早登科第放歷中外英聲脩起際我皇明奉
職詞林用弘裨益恩眷彌深使節煌煌遠臨交趾夷俗
不變龍顏以喜寵命方降訃音遠來天語興嗟失茲良
才廖道南曰使於四方不辱君命可以為難乃若李文

子求遭喪之禮以行亦求不辱而已以寧持節避荒行
李蕭條生則哦詩自樂寄興翠屏死則述詩見志投疏
皂囊亦可謂不辱君命已矣贊曰閩山之壘是為古田
堅持古道希古之賢嗟哉斯人死于王事去邊就華卒
死遠裔

翰林院侍講學士李紳

李紳

原闕

洪武初為典籍十五年十一月

乃陟為侍講學士上賜之勅曰治天下之美非賢何以

治民非文何以昌化文所以備載萬物闡演幽微昔有
唐天下歲和時豐乃啓弘文館集四方之賢任館內之
事內相慮勤以致遐邇來庭外戶不閉斗米三錢家給
人足朕欲肩之何用賢之道不齊致遺賢於遠邇今特
命爾翀居是任尚期文同韓柳勲比房杜以昌治化汝
往欽哉十七年正月庚戌上與翀等論武事翀曰用兵
重在任將上曰任將之道固重然必任之重信之篤而
後可以成功昔齊用司馬穰苴魏用樂羊可謂任之專

信之薦故皆有功若唐憲宗用魚朝恩肅宗用吐突承
璀為監軍諸將掣肘以致敗事者是任將不專信之不
薦故也神曰惟陛下聖明深知滋弊上曰將必擇有識
有謀有仁有勇者有識能察幾于未形有謀能制勝于
未動有仁能得士心有勇能摧堅破銳兼是四者而後
可以成功然亦在人君任之何如爾又有王時者以元
故官與危素同為侍講學士有李遜者直隸景州人登
洪武甲子鄉試官至學士其行蹟多不考云廖道南曰

易有之聖人作而萬物睹信哉言乎觀李紳之勅詞望
以文同韓柳歟此房杜意亦至矣贊曰紳也鳳舉竹實
梧陰于彼高崗栖于禁林時以舊臣天為其主素既無
為於爾何取鈞以儒學遜以選舉寥寥今古莫可遐晤

翰林院直學士陳桎

陳桎字子經浙江奉化人祖著宋祕監知台州父祕元
饒州教授桎自束髮受書即知弘前人業乃撰紀二百
卷傳諸同志又上論遠古逮于高辛下據三史會于有

宋述近理刪繁詞比事於通鑑較義於綱目斟酌前編而不必苟同至於尊正統以定大分凜然大義萬世不可易也其紀年則司馬公之補遺其書法則朱文公之綱目猶不敢自比於二公故但名之曰通鑑續編洪武二年春正月以朱升為學士詹同及裀為直學士廖道南曰墳典既遐史傳斯創左史紀言右史紀動後世沿之紀言為實訓紀動為實錄文彌繁而道愈遠矣乃若陳子經值元末亂亡潛心史學祖晦翁綱目之律例述

君實資治之龜鑑昭正統彰大義其文核其事該其旨
淵以正可不謂良史爾矣乎贊曰兩浙之區實為輿壩
天目峯嶢鴈蕩蜿蜒篤生良士為國仁賢表章正學纂
緝遺編董孤斯偶班馬仔肩予生也晚有開必先

翰林院侍讀學士秦裕伯

秦裕伯字景容大名人從父仕元郝就學胄監登第累
官至福建行省郎中會世亂棄官寓揚州復避地松江
之上海以養母時張士誠據蘇州遣人招之不納吳元

年上命中書省檄下松江起之裕伯對使者曰受元祿二十餘年背之不忠也母喪未終亡哀而出不孝也乃上書中書省固辭洪武元年復檄起之稱疾不出上乃手書諭之曰海濱之民好聞裕伯智謀之士而居此地苟堅守不起恐有後悔裕伯拜書入朝辯博善為辭說上命為侍讀學士洪武二年改待制一日論學術上曰為學之道志不可滿量不可狹意不可矜志滿則盈量狹則驕意矜則小盈則損驕則惰小則陋故聖人之學

以天為準賢人之學以聖為則苟局于小而拘于凡近
豈能充廣其學哉裕伯對曰誠如聖言尋出知隴州廖
道南曰子讀國初事蹟乃知楚才晉用不獨裕伯為然
易有之水就濕火就燥雲從龍風從虎聖人作而萬物
睹其然乎贊曰大名之北瀛海攸趨松江之南笠澤攸
濡矯矯裕伯士林之魁出遇真人左右是昆明哲保身
云何桑隅誦厥遺言悵然深悲

翰林院侍講學士潘廷堅

潘廷堅字叔間太平當塗人先世業儒有聲江左廷堅性資穎拔博學強記元末教授鄉邦學者多從之遊會薦起為富陽縣教諭歲乙未高皇渡江駐蹕采石廷堅同李習陶安謁見遂命為太平府教授明年金陵平召為中書博士庚子補金華同知壬寅入拜侍講學士階嘉議大夫以年老致政廷堅為人慎密謙約每忝謨議為上所重子黼為起居注中書左司都事江西湖東按察使今其裔家當塗之多福鄉廖道南曰予觀太平志

乃見天兵初臨者儒人謁然皆彬彬然多文學士視漢之鄴生諸人尚變詐恃智巧者不侔矣贊曰大江浩渺采石縈紆篤生英哲雅集師儒伯羽既翔主敬為基叔間多學探討淵微彙征斯古聯翩以飛鬱鬱禁林鸞鳳攸栖高山景行于茲焉依

翰林院侍講學士葛鈞

葛鈞

原闕

洪武初以明經薦授河南府學教

授躬行訓督多所造就徵為侍講學士時劉三吾以耆

儒掌院鈞與相得甚懽凡草創禮儀稽考經籍享祀神祇校閱文卷固不事事庚午九月命鈞考定諸臣封爵之制鈞奏宋制功臣韓琦生封魏國沒封蘄王考其先世止封公爵王及三代別無舊制若開平王常遇春三代封王出自特恩難為定例今中山王徐達岐陽王李文忠追贈三代宜准宋制上謂中山岐陽皆開國元勳三代准贈王爵十一月高麗貢玳瑁筆分賜三吾及鈞等是年命授泰晉諸王經銓曹糾其怠惰上曰儒者不

任劇職俱降國子助教未幾復職廖道南曰漢初命叔
孫通創縣範之儀史稱其為漢儒宗大叔孫所定未必
如先王經制而因時制宜要亦有可行者我朝自陶安
朱升詹同宋濂魏觀諸儒開厥初即繼以三吾與鈞率
循彝典潤色黻猷於乎蔚矣贊曰石渠蘭臺漢閣儲書
崇文麗正唐院延儒草昧建侯雲雷啓運登崇俊良以
協中正鈞也端亮矯跡中原碧嵩渾河靈啓崑崙

翰林院侍讀學士王達

王達字達善常州無錫人初以明經授邑庠訓導入補國子助教太宗登極姚廣孝薦之擢編修侍皇太子于東宮尋進侍讀學士甲申七月進講乾卦九四一爻舉儲貳為說仁宗問楊士奇恐達含諷意士奇對曰講官非正道不陳豈敢譏諷此宋儒胡瑗之說也仁宗曰易旨無之若過庸人亦將為茲說乎士奇曰程子有云凡卦六爻聖賢有聖賢用衆人有衆人用君有君用臣有臣用宋王昭素講易以節儉莫若愛民養心莫若寡欲

為對宋太祖持書其言于屏間仁宗遂悅命諸臣分撰
五經講義以進一日太宗問建文君如何達對曰可與
為善惜輔導非其人以是誤之耳後櫻疾卒年六十五
時有曾章字日章者永樂辛酉以侍讀學士置南院與
達蓋後先相望云廖道南曰予觀毘陵志稱達所著有
詩書心法易經選註桂林機要及天游集是亦潛心于
理性者惜乎未之槩見也贊曰立賢無方夢卜惟徵論
學無窮博約惟明吁嗟達善署庠贊冒論易儲闡談詩

文淵誰其闡幽國史有紀毘陵之志未究厥委

翰林院學士王景

王景字景彰浙江松陽人洪武中以明經薦授懷遠教諭歷陞知州擢山西布政司右叅政坐事謫雲南撰平雲南頌及黔寧昭靖王碑建文中以知縣召入纂修高廟實錄守制服闋吏部尚書張統前為雲南布政雅知其賢薦陞翰林院侍講太宗入正大統陞學士一日問建文君葬禮景對宜從厚葬以天子禮上然其言景博

學以古文自擅亦擅筆札然不謹細故與時多忤云廖
道南曰予考文衡乃見王景彰所撰諸篇俱春容爾雅
暢茂敷賁乃知國初渾厚和平之氣不獨於運數見之
寔有徵于文物也已贊曰渤海之濱巨儒潛光滇池之
潁逐臣賁章賜環金門視草玉堂鬱鬱文衡雷電合章
翰林院學士蘭從善

蘭從善字有恒河南磁州人永樂癸酉貢士初任揚州
府學教授召入授編修轉侍讀宣德中預修兩朝實錄

成遷司經局洗馬進侍讀學士未幾改右庶子正統初
陞學士與王文端公錢文肅公相得甚懽賜之奠章曰
卿以文學典教郡邑用膺簡擢進事先朝翰苑宮坊累
遷清秩暨朕嗣統陞職有加史館經筵悉勤乃事操履
篤實益久不渝廖道南曰予觀王文端公稱從善心淳
氣平學行端方景泰易儲詞林加宮保者二十餘員而
從善獨守官如舊及讀崔仲鳧所撰彰德志益信其為
篤厚君子也贊曰燕趙多材古為巨邑太行西來恒山

北峙閭君產焉抱茲奇氣篤實輝光久而不墜

翰林院侍講學士周叙

周叙字功叙江西吉水人永樂戊戌進士選庶吉士授
編修宣德初預修兩朝實錄成轉修撰正統中進侍讀
辛酉閏十一月叙上言三事一曰興學校二曰勸農桑
三曰慎銓選上命所司舉行未幾陞侍講學士掌南京
翰林院事己巳九月英宗北狩叙上言八事一曰勵剛
明二曰觀經史三曰修軍政四曰選賢才五曰安民心

六曰廣言路七曰謹微漸八曰修庶政疏上嘉納天順
初叙上言請修宋史詔令自修進呈又上制治保邦十
二事中興太平十四事俱付所司采擇行之廖道南曰
士之負奇氣樹壯節出而効用於時不少姸姁洪恐以
自立者必有所建白以垂不朽乃若功叙筮仕史官即
上疏論天下事今載諸蘭臺石室者可攷也然而忌才
者衆卒之老於南院而不少試悲夫贊曰皎皎易汙峴
峴難全蘭以香焚膏以明煎上書北臺視篆南署老而

不倦克承墜緒

翰林院侍講學士曹鶴齡

曹鶴齡字延年江西泰和人永樂辛丑進士第一授修撰庚戌秩滿轉侍讀正統戊午預修三朝實錄進侍講學士掌南京翰林院事致仕鶴齡為人和厚易直交際以誠作文典實如其為人初生時母夢鶴翔空而下後頂骨有紅暈故其父命之曰鶴齡云孫追進士及第官編修廖道南曰夫人之生豈亦有殊狀哉宋文憲公之生

也紫衣未脫薛文清公之生也肌如水晶奚必徵諸往
代夫鶴齡亦有然者矣然而功業未究著述靡聞豈其
乘軒而弗鳴皋者耶贊曰有鶴南飛翔于江皋玄裳鶴
衣高栖松巢曾氏夙兆誕瑞彌昭孫繩祖武振羽煙霄

翰林院侍講學士黃諫

黃諫字廷臣陝西蘭縣人曾祖仕源為元提舉祖文質
父志道咸隱約不耀諫幼有異才正統壬戌進士及第
授編修景泰中上饒歌鼓吹曲詔付史館出使安南始

定使臣之禮餽遺悉無所受還朝同少卿劉傑主考順
天鄉試時大學士陳循子瑛王文子倫俱不第遂攜臨
考官賴大學士高穀覆試獲免秩滿轉左春坊左中允
兼編修天順初改尚寶司丞仍兼前職石亨等言其功
擢尚寶卿兼侍講未幾進侍講學士石亨敗謫廣東同
知尋被逮卒于淮兵部尚書王竑時理淮漕嘆曰李杞
葬于羸博之間孔子以為知禮況廷臣高郵人也乃卜
葬于淮成化間官其子琳為中書舍人倪文僖公跋其

鏡歌曰辭旨閎壯音韻鏗鏘誠可施之軍旅者也楊邃
菴銘其墓曰驥足康莊既奮而驥忽一蹶以傷鄧林之
良登置明堂雷風春撞化為土壤奈何乎彼蒼惟劍之
氣與玉之光不隨物以亡膠道南曰予讀黃公使南藁
及南坡諸集蒼然之色淵然之光直逼古人及攷國史
始阮于陳循終阮于石亨豈造物者亦忌才乎贊曰三
秦帝京兩淮帝鄉生也挺秀沒也流芳幸菴有贊遽菴
有志誰表遺書以傳奕世

翰林院侍讀學士吳希賢

吳希賢字汝賢福建莆田人天順甲申進士選庶吉士授檢討與修英廟實錄陞修撰成化乙巳遷左諭德丁未進侍讀學士掌南京翰林院事希賢為文章有奇氣尤工於詩每僚友宴會累數百言立就人多服其敏然負氣豪俠人亦以是少之太常卿陳音銘其墓曰東野昌詩子厚優文君殆兼之永楮厥芬廖道南曰予觀莆陽文獻謂希賢與西涯咸稱神童及同舉進士則又相

金
卷四
篤厚以故西涯真文有云國有譽望代有文章非虛語也贊曰有美一人宛清揚兮為蟬則綏蟹有匡今天球河圖寶物歲兮仰觀斗牛劍氣光兮

翰林院侍講學士曾彥

曾彥字士美江西泰和人成化戊戌進士第一授修撰時執政欲矯時弊掾文以質而彥所對簡約遂置之魁選邱文莊公作春聯以贈之彥年已近六十餘矣丁未轉侍讀弘治紀元預修憲廟實錄遷左諭德甲申進侍

講學士掌南京翰林院事廖道南曰夫士童而習之白
首紛如養其才將有試也茂其學將有為也乃若老而
射策居殿元者在前則曾士美在後則唐守之俱遲暮
不振無聞于時惟吳文定公則老而不衰乃克自見豈
天之降才爾殊哉贊曰孰謂桑榆取日虞淵孰謂湛盧
貫斗龍泉壯而行之老而彌堅未酬厥志夫奚取焉

翰林院侍讀學士徐穆

徐穆字舜和江西吉水人幼聰悟日記千餘言弘治癸

丑進士及第授編修己未同考禮闈得倫文叙為省元
癸亥轉侍讀預修通鑑纂要宋元論斷多出其手乙丑
復考禮闈得董玘為省元二公皆名士人以此多穆之
知人武宗登極奉使朝鮮還朝預修孝廟實錄充經筵
講官值逆瑾柄國怒諸詞林不為禮乃改汪俊等于別
衙門是時穆居外艱改南京禮部員外郎服闋改兵部
瑾敗復職病甚擢侍讀學士卒廖道南曰予觀李文正
公所撰墓誌稱穆事親孝事長恭博極羣籍公堂廣坐

言論英發略無遜避非其人噤不出一語其所自負每
骯髒不下物蓋實錄也贊曰躍之鏗然鑄之凝然擊之
錚然若干將然胡為而然而胡不然抑豈其然



殿閣詞林記卷四